



BOSNA I HERCEGOVINA
PARLAMENTARNA SKUPŠTINA
PREDSTAVNIČKI DOM
ADMINISTRATIVNA KOMISIJA
Broj: 01/7-011-83/03
Sarajevo, 06. 02.2003. godine

ZAPISNIK

treće sjednice Administrativne komisije Predstavničkog doma Parlamentarne skupštine BiH. Treća sjednica održana je 28.01.2003. godine, s početkom u 11,00 sati, u zgradi institucija BiH.

Sjednicom je predsjedavao predsjedavajući Komisije Izet Žigić.

Sjednici su, osim predsjedavajućeg, prisustvovali članovi Komisije: Šefik Džaferović, Mirko Blagojević, Hazim Felić, Niko Lozančić, Vinko Zorić, Momčilo Novaković i Jozo Križanović.

Sjednici Komisije opravdano nisu prisustvovali Vinko Zorić, te Niko Lozančić .

Sjednici su prisustvovali Vedran Hadžović, sekretar Zajedničke službe, Branka Todorović, sekretar Predstavničkog doma, Mirjana Crnjak, šef Opće službe, Jadranka Korać, šef Službe računovodstva, i Dragica Hinić, stručni saradnik u radnim komisijama Parlamentarne skupštine BiH.

Za sjednicu je predložen slijedeći

DNEVNI RED:

1. Usvajanje Zapisnika 2. sjednice Administrativne komisije;
2. Provođenje Odluke o pravima poslanika i delegata na stalnom radu u Parlamentarnoj skupštini BiH nakon 05.10.2002. godine;
3. Razmatranje zahtjeva za profesionaliziranje poslanika;
4. Utvrđivanje kriterija za ostvarivanje prava poslanika na odvojeni život i razmatranje pojedinačnih zahtjeva poslanika za ostvarivanje naknada iz prava na odvojeni život ;
5. Izmjena i dopuna odluke Administrativne komisije vezane za realiziranje Zaključka o izjednačavanju prava predsjednika klubova Predstavničkog doma i Doma naroda i izmjene i dopune Pravilnika o plaćama i nadoknadama državnih službenika i namještenika u Sekretarijatu Parlamentarne skupštine BiH;
6. Razno.

Dnevni red usvojen je jednoglasno.

Ad.1.

a)Zapisnik druge sjednice Administrativne komisije usvojen je jednoglasno.

b)Shodno zaključku prethodne sjednice Komisije, za prvog zamjenika predsjedavajućeg Komisije iz reda srpskog naroda jednoglasno je izabran Nikola Kragulj.

Kako je jednoglasno usvojen zaključak da se pokuša održati zajednička sjednica s Komisijom za finansijske i administrativne poslove Doma naroda ukoliko bude konstituirana , 03.02.2003. godine., sjednica je prekinuta u 12,30 sati.

Nastavak treće sjednice održan je 03.02.2003. godine, s početkom u 16,00 sati.

Nastavkom treće sjednice predsjedavao je Nikola Kragulj, drugi zamjenik predsjedavajućeg Komisije, s obzirom da je predsjedavajući Komisije Izet Žigić došao na sjednicu u 16,45 sati. Sjednici su prisustvovali članovi Komisije: Nikola Kragulj, Jozo Križanović, Mirko Blagojević, Hazim Felić, Momčilo Novaković, Izet Žigić i Šefik Džaferović, koji je iz opravdanih razloga napustio sjednicu u 17,00 sati.

Sjednici Komisije opravdano nisu prisustvovali Vinko Zorić, te Niko Lozančić .

Sjednici su prisustvovali Vedran Hadžović, sekretar Zajedničke službe, Branka Todorović, sekretar Predstavničkog doma, Mirjana Crnjak, šef Opšte službe, Jadranka Korać, šef Službe računovodstva, Aljoša Čampara, sekretar Ustavno-pravne komisije Doma naroda, i Dragica Hinić, stručni saradnik u radnim komisijama Parlamentarne skupštine BiH.

Aljoša Čampara informirao je prisutne da sjednici neće pristupiti članovi Komisije za finansijsko-administrativne poslove Doma naroda, jer ova komisija još uvijek nije održala svoju prvu konstituirajuću sjednicu, te se ne može ni održati zajednička sjednica ovih komisija.

Nakon ove informacije, sjednica je nastavljena razmatranjem preostalih tačaka usvojenog dnevnog reda, po metodologiji utvrđenoj za ovu sjednicu. Po toj metodologiji, Komisija će, zbog hitnosti donošenja pojedinih odluka vezanih za obračun plaća i ostalih prinadležnosti za ovaj mjesec, donijeti odluke za pitanja gdje može samostalno odlučivati, dok će o preostalim pitanjima, vezanim za eventualne promjene odluka koje donose administrativne komisije oba doma, zauzeti stavove, koje će zastupati na zajedničkoj sjednici ovih komisija.

Ad.2.

Nikola Kragulj informirao je o pristiglim prigovorima poslanika prethodnog saziva ovog parlamenta vezanim za provođenje Odluke o pravima poslanika i delegata na stalnom radu u Parlamentarnoj skupštini BiH, nakon isteka mandata 05.10.2002. godine. Njihovi prigovori razvrstani su u tri kategorije i to: prigovori dva poslanika na rješenje o prestanku profesionalnog radnog odnosa u Parlamentu, a imaju status penzionera, zatim zahtjevi pet poslanika koji nemaju rješenje o mirovanju radnog odnosa s ranijim poslodavcem i žele u Parlamentu ostati neraspoređeni, i zahtjevi pet poslanika koji su umirovili svoj radno-pravni odnos s ranijim poslodavcem dok im traje mandat, ali se ne mogu tamo vratiti, te žele ostati neraspoređeni u Parlamentu.

U raspravi o ovom pitanju učestvovali su Šefik Džaferović, Vedran Hadžović, Branka Todorović, Jozo Križanović, Nikola Kragulj, Momčilo Novaković, Izet Žigić, Mirjana Crnjak i Aljoša Čampara.

Vedran Hadžović, Mirjana Crnjak i Branka Todorović ukratko su obrazložili Odluku o pravima poslanika i delegata i istaknuli svoje mišljenje o pojedinim zahtjevima i prigovorima poslanika. Potom su posebno naglasili problem nekoliko poslanika, u okviru ove treće grupe, kod kojih je u međuvremenu došlo do promjena, i ne mogu se vratiti u raniju firmu, iako su umirovili svoj radno-pravni status, zato što je došlo ili do prestanka rada firme ili unutrašnje reorganizacije.

Nakon rasprave članovi Komisije jednoglasno su usvojili slijedeće zaključke:

a) U okviru prve grupe, koja tretira prigovore poslanika, odlučeno je da se odbije prigovor Muhameda Begovića, koji je imao status penzionera s punim penzijskim stažom jer, saglasno Odluci i zakonskim odredbama, ne može dalje imati radno-pravni status kao neraspoređen u Parlamentu.

Po prigovoru Bahrije Osmanović treba uputiti hitno dopis Fondu PIO/MIO za tumačenje, da li imenovana trenutno ima status penzionera ili i dalje ostvaruje prava radnika iz radnog odnosa s mogućnošću da bude neraspoređena, s obzirom da nije ostvarila puni penzijski staž. Ovu provjeru potrebno je izvršiti da bi se ispoštovali zakonski propisi u potpunosti i time izbjegla mogućnost eventualnog sudskog procesa koji imenovana može pokrenuti. Nakon dobijanja tumačenja, odmah će biti donesena odluka.

b) Treba omogućiti ostvarivanje prava iz radno-pravnog statusa, u svojstvu neraspoređenih radnika u Parlamentu, poslanicima koji su podnijeli zahtjeve u okviru druge i treće grupe, a priložili su potvrde da su trenutno nezaposleni. Iz druge grupe to su: Branislava Ferzanović, Marko Amidžić i Halil Mehtić. Iz treće grupe to su: Adem Borić, Ramiz Vilić i Željko Bilbija.

Kako postoje očigledna saznanja za neke od poslanika da rade u određenim ustanovama, a koji svoj trenutni status nisu dokumentovali, zaključeno je da im se uputi dopis sa zahtjevom da prilože uvjerenja o svom trenutnom radno-pravnom statusu. Ovaj dopis bit će upućen Ljubomiru Kovačeviću, Abdurahmanu Malkiću, Branislavu Loliću i Mirku Banjcu. Ukoliko ne prilože traženo uvjerenje, njihovim zahtjevima za ostvarivanjem prava iz radno-pravnog odnosa kod ovog parlamenta neće biti udovoljeno.

c) Zauzet je stav, koji će biti zastupan na zajedničkoj sjednici ovih komisija oba doma, da ova prava poslanici ostvaruju isključivo šest mjeseci, vodeći računa da je taj rok utvrđen u gotovo svim drugim državnim organima.

Ad.3.

Nikola Kragulj ukratko je informirao da su 33 poslanika podnijela zahtjev za ostvarivanje profesionalnog radnog statusa kod ovog parlamenta, s različitim vremenom od kada žele ostvariti taj status.

U potom otvorenoj raspravi učestvovali su Jozo Križanović i Vedran Hadžović.

Posebno je istaknuto pitanje retroaktivnog ostvarivanja ovog prava, s obzirom na zakonske odredbe, a u kontekstu da su dva poslanika, koja su imala mandat u Parlamentu FBiH, podnijela zahtjev za profesionaliziranje počev od 01.12.2002. godine, što za njih predstavlja objektivan problem zbog zaključenih radnih knjižica.

Nakon okončane rasprave, članovi Komisije jednoglasno su usvojili zaključak da je profesionaliziranje poslanika moguće, počev od dana davanja svečane izjave 03.12.2002. godine, s tim da će, za svakog poslanika pojedinačno, teći od trenutka zaključenja radne knjižice kod ranijeg poslodavca i podnošenja radne dokumentacije nadležnoj službi ovog parlamenta.

Jedini izuzetak odnosi se na mogućnost ostvarenja ovog statusa za dva ranije navedena poslanika od 01.12.2002. godine i to Seadu Palavrić i Mirsada Ćemana.

Ad.4.

Nikola Kragulj obrazložio je ukratko ovu tačku dnevnog reda. Istaknuo je da ova komisija treba usvojiti kriterije po kojima će poslanicima biti omogućeno ostvarivanje prava na odvojeni život od porodice. Do održavanja sjednice, sedam poslanika podnijelo je zahtjev za ostvarivanje prava na odvojeni život.

Potom su u raspravi učestvovali Vedran Hadžović, Momčilo Novaković, Izet Žigić i Jozo Križanović.

Svi učesnici u raspravi jedinstvenog su gledišta, koje proizilazi iz Odluke koja regulira pitanje načina obračuna plaća i ostalih materijalnih prava poslanika i delegata, a vezano je za isplatu naknade za odvojeni život. Po ovoj odluci, poslaniku, ukoliko podnese zahtjev za ostvarivanje naknade za odvojeni život, pripada ta naknada, kao i naknada za zakup stana, te pravo na

naknadu troškova prijevoza do četiri puta mjesečno radi posjete porodici. Naglašeno je da u tom slučaju nema pravo na dnevnice i putne troškove vezane za sudjelovanje u radu sjednica domova i komisija. U svakom slučaju, ova komisija mora donijeti konkretne pojedinačne odluke za sve one poslanike koji su podnijeli zahtjev.

Nakon okončane rasprave, članovi Komisije jednoglasno su donijeli zaključak da se omogućiti ostvarivanje prava na naknadu za odvojeni život od porodice svim poslanicima koji se izjasne za to, uz striktno poštovanje Odluke o izmjenama i dopunama Odluke o načinu obračuna plaća i ostalih materijalnih prava poslanika i delegata u Parlamentarnoj skupštini BiH, vodeći računa da poslanici koji ostvaruju pravo na naknadu za odvojeni život moraju posjedovati ugovor o zakupu stana, koji će biti evidentiran kod nadležne službe ovog parlamenta, te neće imati pravo na dnevnice i putne troškove vezane za rad sjednica domova i komisija.

Ad.5.

Nikola Kragulj informirao je o prijedlozima za izmjene i dopune odluka, po ovoj tački dnevnog reda, i istaknuo da je u ovom slučaju potrebno donošenje odluke administrativnih komisija oba doma na zajedničkoj sjednici. Stoga ova komisija može isključivo utvrditi svoje stavove koje će prezentirati i zastupati na zajedničkoj sjednici.

U raspravi su dalje učestvovali Šefik Džaferović, Izet Žigić, Vedran Hadžović i Momčilo Novaković.

Nakon rasprave, članovi Komisije jednoglasno su usvojili stavove koje će zastupati na zajedničkoj sjednici administrativnih komisija oba doma kako slijedi:

a) Nema nabavke mobilnih telefona poslanicima-delegatima, niti zaposlenim službenicima. Ostaje isključivo pravo na naknadu troškova za korištenje mobilnih telefona u visini utvrđenoj Odlukom koja regulira ovu problematiku. Poslanici- delegati, koji su dobili mobilne telefone na korištenje, dužni su ih vratiti Parlamentu.

b) Ukinuti pravo na angažiranje vozača predsjedavajućim komisija oba doma i predsjedavajućim klubova Doma naroda, kao i sva prava koja vozači crpe iz Odluke o pravu na angažiranje vozača i naknadama za vozače.

Ad.6.

Vedran Hadžović ukratko je informirao ovu komisiju da je Komisija za finansijsko-administrativne poslove Doma naroda u prethodnom sazivu donijela odluku o isplati naknade za korištenje mobilnih telefona službenicima raspoređenim u službi Doma naroda, u visini od 80 KM, a ova komisija prošlog saziva, službenicima za koje je nadležna, u visini od 50 KM. Kako je visina ove naknade ostala neusaglašena, predložio je da ova komisija donese odluku o isplati navedene naknade službenicima u visini od 80 KM.

Članovi komisije su potom jednoglasno donijeli odluku o isplati naknade za korištenje mobilnih telefona službenicima za koje je ova komisija nadležna, a koji imaju pravo na to, u visini od 80 KM.

Sjednica je završena u 18,00 sati.

Stručni saradnik u
radnim komisijama
Dragica Hinić

Drugi zamjenik predsjedavajućeg
Administrativne komisije
Nikola Kragulj